

六韜直解

二

武韜

漢書門類	五三〇一	函號	四一	架冊	六四
------	------	----	----	----	----

漢書門類	五三〇一	函號	六六	架冊	九一
------	------	----	----	----	----

內閣文庫		
番號	漢	5301
冊數	6 (2)	
函號	299	197



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM: Kodak



六韜直解卷第二

武韜

發啓十三

發啓者開發啓迪其憂民之道也
取書中發字啓字以名篇

文王在艷召太公曰嗚呼商王虐極罪殺不
辜公尚助予憂民如何

文王在艷邑召太公問曰嗚呼今商王暴
虐已極罪殺無辜之人如斮朝涉之脛剖

淺草文庫

賢人之心之類所以文王嗟嘆而言之也
公尚助予憂天下之民其道如何

太公曰王其脩德以下賢惠民以觀天道天
道無殃不可先倡人道無災不可先謀

太公對曰王其脩德以下賢士子惠兆民
以觀天道天道無殃不可先倡而爲之人
道無災不可先謀而起之

必見天殃又見人災乃可以謀必見其陽又
見其陰乃知其心必見其外又見其內乃知

其意必見其疏又見其親乃知其情

必見上天之降殃又見下民之生災乃可
以謀而爲之天殃如日月失明星辰逆行
夏霜冬雷春凋秋榮之類是也人災如五
谷不熟饑饉荐臻盜賊滋熾姦宄竊發之
類是也陽顯明之地陰幽暗之處顯明之
地所爲者皆暴虐之事幽暗之處所爲者
皆淫惡之行乃知其心之昏惑也必見其
外之所行又見其內之所養外之所行者

皆賊虐之政內之所養者皆邪僻之非乃知其意之迷亂也如紂外則殺忠賢而賊諫輔內則肆醜昏而耽色慾心神昏惑志意迷亂從可知矣必見其疏遠者離叛又見其親近者放逐乃知其情之向背也如紂遠則江沱汝漢之間悉從文王之化近則微子去箕子奴人情之向背亦從可知矣

行其道道可致也從其門門可入也立其禮禮可成也爭其強強可勝也

行其道道可得而致也從其門門可得而入也立其禮禮可得而成也爭其強強可得而勝也

全勝不鬪大兵無創與鬼神通微哉微哉與人同病相救同情相成同惡相助同好相趨故無甲兵而勝無衝機而攻無溝塹而守全勝不在戰鬪在勝於無形大兵無欲傷殘在完吾士衆能勝於無形而兵無傷殘

是其智與鬼神通所以重言微哉微哉而
嘆其妙也與人同病而相救援同情而相
成就同惡而相扶助同好而相趨向故無
甲兵而能勝人無衝機而能攻擊無溝塹
而能固守衝衝車從旁衝擊者也機弩牙
也

大智不智大謀不謀大勇不勇大利不利利
天下者天下啓之害天下者天下閉之

大智人不見其智大謀人不見其謀大勇
人不見其勇大利人不見其利利天下者
天下之人皆開啓之害天下者天下之人
皆閉塞之

天下者非一人之天下乃天下之天下也取
天下者若逐野獸而天下皆有分肉之心若
同舟而濟濟則皆同其利敗則皆同其害然
則皆有以啓之無有閉之也

天下者非一人之天下乃天下人之天下
也其取天下者若追逐野獸而天下皆有

分肉之心若同舟濟水既濟則皆同得其利若敗則皆同受其害如此則天下皆可以開啓之無有以閉塞之也

無取於民者取民者也無取民者民利之無取國者國利之無取天下者天下利之

人君無取於民者其實取民者也取於民者奪民之利也取民者得民心之歸也民心歸豈有不利者哉所謂行仁義而自無不利者也故無取於民者民利之無取於

國者國利之無取於天下者天下利之民利之者民歸之也國利之者一國歸之也天下利之者天下之人歸之也民歸之一國歸之天下歸之此所以天下啓之也

故道在不可見事在不可聞勝在不可知微哉微哉鷺鳥將擊卑飛斂翼猛獸將搏弭耳俯伏聖人將動必有愚色

故道之妙在衆人之不可見事之密在衆人之不可聞勝之巧在衆人之不可知微

哉微哉嘆其妙之至也鷙疾之鳥將有所
擊必卑飛而收斂其翼威猛之獸將有所
搏必弭耳而俯伏其身明聖之人將有所
動必有如愚之色此蓋欲文王遵養時晦
以待之耳
今彼有商衆口相惑紛紛渺渺好色無極此
亡國之證也

今彼有商之君衆口互相惑亂紛紛渺渺
好色之心無有窮極此乃亡國之證也紛

紛紊亂之貌渺渺無窮之貌

吾觀其野草管勝穀吾觀其衆邪曲勝直吾
觀其吏暴虐殘疾敗法亂刑上下不覺此亡
國之時也

吾觀其田野草管勝五穀吾觀其人衆邪
曲勝正直吾觀其爲吏者惟務暴虐殘疾
敗亂國之刑法上下皆不覺悟此乃亡國
之時也

大明發而萬物皆照大義發而萬物皆利大

兵發而萬物皆服大哉聖人之德獨聞獨見
樂哉

大明日也大明發而萬物皆得其照大義
發而萬物皆得其利大兵發而萬物皆服
其心大哉聖人之德有人所不及聞見而
已獨聞獨見自得其樂哉

文啓十四

文啓以文德起迪其民也蓋取書
中之義以名篇

文王問太公曰聖人何守太公曰何憂何嗇
萬物皆得何嗇何憂萬物皆適

文王問太公曰聖人何所守太公對曰何
用憂而何用嗇乎萬物皆可得也何用嗇
而何用憂乎萬物皆可適也嗇吝也適聚
也詩曰百祿是適集傳訓聚

政之所施莫知其化時之可王莫知其移聖
人守此而萬物化何窮之有終而主始
政之所施而人莫知其化時之所在而人

莫知其移所謂聖人無爲而成治天道無爲而成事也聖人守此無爲之政而萬物自化而爲善何有窮盡亦如天道之終而復始循環無極也

優而游之展轉求之求而得之不可不藏既以藏之不可不行既以行之勿復明之

優游自如之貌承上文而言聖人之所以無爲者優游自如耳故當展轉求之展者轉之半轉者展之周欲其反覆而求之也

求而能得之不可不藏之於密既以藏之於密又不可不行之於人既以行之於人勿復自彰明之

夫天地不自明故能長生聖人不自明故能名彰

夫天地惟其不自明也故能長生萬物聖人惟其不自明也故能名譽彰顯醫書有云天明則日月不明言天不自明故日月得而明也若天之精氣呈露而自明日月

亦不能明矣。謂天地隱德弗曜而萬物得以長生，聖人隱德弗曜而名譽得以彰顯也。

古之聖人聚人而爲家，聚家而爲國，聚國而爲天下，分封賢人以爲萬國，命之曰大紀。上古聖人聚人而爲之家，聚家而爲之國，聚國而爲之天下，分封賢德之人以爲萬國，諸侯命之曰大紀。大紀者國家之大綱紀也。

陳其政教順其民俗，群曲化直，變於形容萬國不通，各樂其所，人愛其上，命之曰大定。敷陳其政事，教化順從其民之風俗，使群曲皆化爲直，而變於形容萬國風俗，雖不通，各得樂其所，人皆愛其上，命之曰大定。大定者天下之大平定也。

嗚呼！聖人務靜之，賢人務正之，愚人不能正，故與人爭，上勞則刑繁，刑繁則民憂，民憂則流亡，上下不安，其生累世不休，命之曰大失。

鳴呼嘆辭嗟嘆而言聖人務靜以待之賢
入務正以率之愚人不能正以率下故與
人必爭上之人勞則刑罰繁多刑罰繁多
則民心生憂民心生憂則思流離逃亡上
下皆不能安其生而累世不能休息命之
曰大失大失者國家之政今大失也
天下之人如流水障之則止啓之則行靜之
則清

天下之人情譬如流水遮障之則停止開

啓之則通行靜澄之則潔清

嗚呼神哉聖人見其始則知其終

又嗟嘆而言嗚呼神妙哉聖人既見其物
之始則知其物之終謂見其民之所以始
則知其民之所以終也

文王曰靜之奈何太公曰天有常形民有常
生與天下共其生而天下靜矣

文王曰聖人務靜之道奈何太公對曰天
有恒常之形體民有恒常之生意天之常

形謂春而生夏而長秋而成冬而藏也民
之常生謂春而耕夏而耘秋而斂冬而息
也能與天下共其生生之理而天下自靜
矣

太上因之其次化之夫民化而從政是以天
無爲而成事民無與而自富此聖人之德也
文王曰公言乃協予懷夙夜念之不忘以用
爲常

太上者因民而成治其次者用化以成俗
夫民化於下而從人君之政是以天道無
爲而成事事猶物也民無所與而自致富
謂不奪其時薄其賦斂使民安其田野家
給人足是無與而自富此乃聖人之德也
文王曰公言乃協予之所懷當早夜念之
而不忘用以爲治國之常道也

文伐十五

文伐者以文事伐人不用交兵接
刃而伐之也以文王問文伐之法

故取以名篇

文王問太公曰文伐之法奈何太公曰凡文伐有十二節

文王問太公曰以文伐人之法奈何太公對曰凡文伐有一十二節

一曰因其所喜以順其志彼將生驕必有好事苟能因之必能去之

一曰因其彼國之所喜好以順從其志意彼將生驕慢之心亦必有好事自起吾誠

能因之彼必能去之如智伯喜地韓魏因而與之東胡喜馬冒頓因而獻之是也

二曰親其所愛以分其威一人兩心其中必衰廷無忠臣社稷必危

次二曰親其彼國之所愛者以分其國威一人而懷兩心其中必然衰弱若廷無忠臣以諍之社稷必至於危亡矣如張儀入楚楚欲殺之儀賂靳尚說鄭袖而免之因勸楚與諸侯連衡以事秦之類是也

三曰陰賂左右得情甚深身內情外國將生
害

次三曰陰賂彼國之左右近臣得其情與
我甚深彼身雖在內而情却在外其國必
將生害矣如秦人賂趙之郭開越人賂吳
之白嚳是也

四曰輔其淫樂以廣其志厚賂珠玉娛以美
人卑辭委聽順命而合彼將不爭奸節乃定
次四曰輔其淫樂以廣其荒怠之志厚賂

以珠玉娛之以美人卑其辭而委聽於彼
順其命而求合於君彼將不與我爭而奸
節乃定矣如越以西施獻吳列士以上皆
有賂是也

五曰嚴其忠臣而薄其賂稽留其使勿聽其
事亟爲置代遺以誠事親而信之其君將復
合之苟能嚴之國乃可謀

次五曰嚴敬其忠臣而薄其賄賂稽留其
來使勿聽信其事亟爲置代而遺以誠事

求與親而信之其君將復來合之誠能嚴
之國乃可得而謀也

六曰收其內間其外才臣外相敵國內侵國
鮮不亡

次六曰收其內臣而離間其外臣使才臣
在外陰相於我而敵國侵之於內其國鮮
有不亡者一本作收其外間其內才臣內
相敵國外侵國鮮不亡謂收其外臣而間
其內臣使才臣在內相之而敵國在外侵

之其國鮮有不亡者如秦使張儀相魏而
以兵伐之魏終以亡是也

七曰欲錮其心必厚賂之收其左右忠愛陰
示以利令之輕業而蓄積空虛

次七曰欲禁錮其心必厚賂之以利收其
左右忠愛之人結其心使爲我謀也結其
心而因示之以利使彼輕其業而蓄積空
虛耳

八曰賂以重寶因與之謀謀而利之利之必

信是謂重親。重親之積必爲我用。有國而外其地必敗。

次八曰賂其臣以重寶。因與之通謀。謀而又利之。彼貪利而必信於我。是謂重親。重親之積必能爲我之用。有國而外如此其地必至於敗矣。

九曰尊之以名。無難其身。示以大勢。從之必信。致其大尊。先爲之榮。微飾聖人。國乃大偷。次九曰尊之以重名。無艱危其身。示以大

勢。從之以必信。致彼自大。自尊先爲之榮。顯而微飾以聖人。其國乃大偷矣。

十曰下之必信。以得其情。承意應事。如與同生。旣以得之。乃微收之時。及將至。若天喪之。次十曰下之必信。以得彼國之情。承順其意。以應彼國之事。如與之同生。言其情好之密也。旣以得彼之情。乃微收之時。及將至。其國必敗。若天喪之也。或曰下之必信。下字乃示字之誤也。未知是否。

十一曰塞之以道人臣無不重貴與富惡危
與咎陰示大尊而微輸重寶收其豪傑內積
甚厚而外爲之陰內智士使圖其計納勇士
使高其氣富貴甚足而常有繁滋徒黨已具
是謂塞之有國而塞安能有國

次十一曰塞之以其道爲人臣者無不重
貴與富而惡危與咎陰示以大而且尊微
輸以重寶而賂之收其豪傑之心內之所
積者甚厚而吾自外爲之陰內有智之士

使圖其計納勇力之士使高其氣使彼富
貴甚足而常有繁滋吾之徒黨以具是謂
塞之之道有國而爲人塞之安能有其國
也

十二曰養其亂臣以迷之進羨女淫聲以惑
之遺良犬馬以勞之時與大勢以誘之上察
而與天下圖之

次十二曰養其亂臣以迷其心進羨女淫
聲以惑其志遺良犬馬以勞其形時與大

勢以引誘之上察其勢而與天下共圖之
上察以下疑有關文誤字

十二節備乃成武事所謂上察天下察地徵
已見乃伐之

已上十二節全備乃成武事所謂上察天
時下察地理徵驗已見乃伐之此文伐之
法也愚謂文王之所以爲文者純亦不已
而已緝熙敬止而已雖興兵而伐密伐崇
亦順帝之則而已故詩稱之曰無然畔援

無然歆羨誕先登于岸又曰不聞亦式不
諫亦入不顯亦臨無射亦保所謂詐謀詭
道豈文王之所用心哉古之聖人行一不
義殺一不辜而得天下皆不爲也文王三
分天下有其二以服事殷孔子稱其至德
顧不義之事文王肯爲之乎文王以太公
爲師而問文伐之法太公喋喋以謀詐告
之亦獨何心哉不惟文王厭聽而太公亦
難於啓齒矣以文王之世周召方興二南

之化而太公以此詐謀啓之春秋戰國之時又將如之何哉嗚呼此書之所以難盡信也先儒亦曰尚父本有道者謀言兵二百三十一篇豈近世有爲太公術者所增加歟今以此篇文辭考之的非三代聖君賢相授受之言恐是周史依倣而爲之耳學者宜詳辯之

順啓第十六

順啓者順天下人心而啓導之也

此亦取書義以名篇

文王問太公曰何如而可爲天下太公曰大蓋天下然後能容天下信蓋天下然後能約天下仁蓋天下然後能懷天下恩蓋天下然後能保天下權蓋天下然後能不失天下事而不疑則天運不能移時變不能遷此六者備然後可以爲天下政

文王問太公曰何如而可以治天下太公對曰量之大覆蓋天下然後能包容天下

一本作天蓋天下非也信之至覆蓋天下
然後能約束天下仁之極覆蓋天下然後
能懷服天下恩之盛覆蓋天下然後能保
守天下權之道覆蓋天下然後能不失天
下舉事而不疑惑則天運亦不能移時變
亦不能遷此六者全備然後可以爲天下
政

故利天下者天下啓之害天下者天下閉之
生天下者天下德之殺天下者天下賊之徹

天下者天下通之窮天下者天下仇之安天
下者天下恃之危天下者天下災之天下者
非一人之天下唯有道者處之

故利益天下者天下開啓之虛害天下者
天下閉塞之生養天下者天下皆德之殺
戮天下者天下皆賊之能徹天下者天下
皆通之窮困天下者天下皆仇之安定天
下者天下皆恃之危殆天下者天下共災
之天下者非一人之天下唯有道者能處

之

三疑第十七

三疑者欲攻強離親散衆恐力不能而疑之也以武王問三疑故以名篇

武王問太公曰予欲立功有三疑恐力不能攻強離親散衆爲之奈何

武王問太公曰予欲建立大功有三疑焉恐力不能攻彼之強離彼之親散彼之衆

將爲之奈何

太公曰因之慎謀用財夫攻強必養之使強益之使張太強必折太張必缺攻強以強離親以親散衆以衆

太公對曰因之慎其謀用其財耳夫攻強者必養之使盛強益之使奮張彼太強者必然摧折太張者必然缺壞故攻強者必以強離親者必以親散衆者必以衆此皆因其勢而利導之耳

凡謀之道周密爲寶設之以事玩之以利爭心必起

凡謀之道以周密爲寶設之以事機玩之以貨利彼爭心必起矣

欲離其親因其所愛與其寵人與之所欲示之所利因以疏之無使得志彼貪利甚喜遺疑乃止

欲離其親信必因其所愛之臣與其寵幸之人與之以所欲示之以所利因以疏而

遠之無使其人得志於國彼國之人貪利甚喜則其疑乃止矣如秦人賂郭開以間廉頗李牧於趙賂晉鄙之客以間信陵君於魏是也

凡攻之道必先塞其明而後攻其強毀其大除民之害

凡攻人之道必閉塞其彼之所明而後可以攻彼之強毀其大殘大賊以除民之患害大字下疑有關文

淫之以色嗇之以利養之以味娛之以樂既
離其親必使遠民勿使知謀扶而納之莫覺
其意然後可成
淫之以美色嗇之以厚利養之以滋味娛
之以聲樂既離間其親必使又遠其民勿
使彼知其謀扶而納之莫使彼覺其意然
後事可得而成
惠施於民必無愛惜其財民如牛馬當頻
而愛之

惠施於民必無愛惜其財民如牛馬當頻
數餽食之然後從而愛之

心以啓智智以啓財財以啓衆衆以啓賢賢
之有啓以王天下

心以開啓其智智以開啓其財財以開啓
其衆衆以開啓其賢賢者有人開啓是以
能王天下○愚按此篇之旨大抵言欲攻
強離親散衆在慎謀用財而已故下文喋
喋言謀言財與文伐篇十二節意味頗相

似然此篇簡編又多錯亂恐亦後人依倣而爲之者歟

六韜直解卷第二

西澤繁巳

